

每週經課朗誦經文(巴克禮台語漢字)2014/02/02

共同經課 - 1

彌迦書第六章一節~八節

1 今著聽耶和華所講的！起來，你著佇諸個山的面前辯論，互諸個山嶺聽見你的聲。2 諸個山及地堅固的根基啊，著聽耶和華爭辯的話！因為耶和華欲及伊的百姓爭辯，閣欲及以色列排情理。3 我的百姓啊，我曾對你做甚麼？我有甚麼互你為難？你通對我指出。4 我曾導你出埃及地，救贖你脫離做奴才的厝；差摩西、亞倫、米利暗佇你的面前。5 我的百姓啊，恁著記得摩押王巴勒所計謀的及比珥的子巴蘭應伊的話，對什亭到吉甲的事，通互恁知耶和華所行的公義。6 我就近耶和華，跪拜至高的上帝，著用甚麼啊？著用燒祭抑是滿年的牛仔來就近伊啊？7 耶和華歡喜千千隻的公羊嗎？抑是萬萬條溪的油嗎？我著為家己的罪過獻我的大子嗎？為著我心內的罪惡獻我本身所生的嗎？8 人啊，伊曾指示你甚麼是好。耶和華愛你甚麼？獨獨愛你行公義，心存憐憫，謙卑及你的上帝相及行。

共同經課 - 2

詩篇十五篇

1 [大衛的詩。] 耶和華啊，是誰會寄腳佇你的布棚？是誰會倚起佇你的聖山？2 就是所行正直、所做公義、心內講誠實的人。3 伊無用舌加誣人，無歹款待朋友，人誹謗厝邊，伊無四界謠。4 伊的目矚看輕匪類，尊重敬畏耶和華的人。伊咒誓，雖莽家己剋虧亦無變換。5 伊銀借人無為著利息，無受賄賂來害無罪者。行此號事的人永永無搖渌。

共同經課 - 3

哥林多前書一章十八節~三十一節

18 因為十字架的道理，沈淪的人看做蠢；咱得救的人，看做上帝的權能。19 因為有記載講：我欲滅無智慧的人的智慧，也欲棄揀聰明的人的聰明。20 智慧的人佇叨落？經學士佇叨落？此世間好辯論的人佇叨落？上帝豈毋是互世間的智慧變成蠢？21 因為世間既然對 in 的智慧，毋識上帝，上帝就歡喜對所宣傳的蠢來救諸個信的人，這攏是上帝的智慧。22 因為猶太人求神蹟，希利尼人尋智慧，23 若是阮傳釘十字架的基督，對佇猶太人是塞礙，對佇外邦人是愚蠢；24 若是對佇受召的，無論猶太、希利尼，基督做上帝的權能，上帝的智慧。25 因為上帝的愚蠢比人卡智慧，上帝的軟弱比人卡勇壯。26 兄弟啊，試看恁的受召，照肉體有智慧的無佸多，有權力的無佸多，有尊貴的也無佸多。27 若是上帝揀世間的蠢的，來互智慧的人見誚；上帝也揀世間的軟弱的，來互勇壯的見誚。28 上帝也揀世間卑賤的，人看毋上目的，以及許個無的，來廢無許個有的，29 互見若有肉體的，佇上帝的面前無通誇口。30 若是恁對上帝得著惦佇基督耶穌，伊對上帝替咱成做智慧、閣做義、成聖，以及贖回。31 致到照所記載講：「誇口的人，著用主來誇口。」

共同經課 - 4

馬太福音第五章一節~十二節

1 耶穌看見許個歸陣的人，就緝上山，已經坐，伊的學生就近伊，2 伊開嘴教示 in，講：3 心內喪鄉的人有福氣！因為天國是 in 的。4 憂悶的人有福氣！因為 in 欲受安慰。5 溫柔的人有福氣！因為 in 欲承接土地，6 枵嘴乾欣慕義的人有福氣！因為 in 欲得著飽，7 憐憫人的人有福氣！因為 in 欲得著憐憫，8 清氣心肝的人有福氣！因為 in 欲看見上帝。9 互人和平的人有福氣！因為 in 欲稱做上帝的子。10 為著義曾受窘逐的人有福氣！因為天國是 in 的。11 「為著我人才詈罵恁，窘逐恁，誹謗恁萬項的歹，恁就有福氣！12 著歡喜快樂，因為恁佇天裡的報賞是大。因為恁以前的先知人，人亦按呢窘逐 in。」